

Sicole

Kékes etimolodjeyes (biestof des cas dedja veyous e scole)

« **mây** » vént do latén « *magis* » (k' a dné ossu li mot « mins » [fr. *mais*]). E latén, ça vleut dire « plus ».

Egzimpe :

Dji n' a **mây** avou ossu froed mes doets k' ouy [fr. *Je n'ai jamais eu aussi froid aux doigts qu'aujourd'hui*]

« **djamây** », c' est l' aplacaedje di « *dja* » (ki vike co dins « dedja / ddja » [fr. déjà]) et d' « *mây* ». Li francès a fwait parey (« **ja* » + « *mais* »). MINS, dins brâmint des coines, on a djusse riprins l' mot francès « *jamês* », ki s' va diftonguer dins l' Basse Årdene et l' Bote do Hinnot => « *jamwês* ».

Ratourneures avou « *djamây* » / « *jamwês* »

* *djamây* parey (*jamwês parèy*) = foirt grand

Il ont fwait on dinner d' comunion **djamây parey** [fr. *ils ont fait un dîner de communion super grandiose*]

* on n' sait *djamây* (*on n' sét jamwês*) = ça pôreut motoit ariver, wårdans l' espwer.

On dit ki l' walon va mori, mins **on n' sait djamây** : putete k' on-z è rfrè on lingaedje k' on aprind e scole come li flamind.

djus

* vént do latén « *devorsum* » (± riviersé, distourné); adon, racuzinåve avou l' itålyin « *giù* », li roumin « *jos* », l' espagnol « *ayuso* », « *yuso* », li portuguès « *ajuso* ». Mins on n' li rtrouve nén e francès.

* tot seu, come adjectif, i vout dire : a) abatou, foirt hodé ; b) distrût

Dj' a findou å bwès tote li djournêye et dji so **djus**. / Mi viye éndjole est **djus**.

* aplaké a on viebe, i fwait ene vierbire [*locution verbale*] ki mostere on mouvmint do dzeu å dzo, u ene sacwè k' arive a s' fén.

Il ont **flaxhî** l' vî pemî **djus** [*abattu*]. / L' oujhene Camion a **tapé djus**, et mete 30 ovrîs å tchômaedje [*fermé ses portes*]

* avou « di », ça dvént ene divancetire [*locution prépositive = préposition*]

Li grosse voenne del coxhe [*artère fémorale*] pixhive dispu on ptit cwårt d' eure, ey elle esteut **djus d'** sonk [*vidée de tout son sang*]

Dj' a sayî d' shuve les efants ki montént l' gritchete avou l' tchén, mins al copete, dj' esteu **djus d'** shofla [*hors d'haleine, à bout de souffle*]

Li five di laecea, c' est ene vatche ki vént d' veler, et k' est **djus d'** calciom [*hypocalcémique*].

Sicoles di rfondou walon d' Bive do 29 d' octôbe 2019 (scole pa les scolîs)

Eciclopedeye :

L' Odissêye

(Léon Thomas)

Tayiti

(Greg di Tornè)

Les canadas à rosse (*au rousse*)

(Sarah Lambot)

Fé s' pàrt di bwès

(Alfred Wanlin)

Les pàrtis cortis

(Mady d'Orcîmont)

Li crâsse raecene u linwe-di-vatche u oraye-di-bâdet

(Huguette Lucy)

2 tchansons e picârd di Tornè

(Yves De Zutter)

Belès-letes

Les rimas às « dit-st i »

C' est ene compôzucion foirt simpe, la k' on dene on cåzaedje da ene sakî, shuvou di « dit-st i / dit-st ele », pu l' no del djin.

Dins l' rimea, on nd a d' keure del longueur del lene (pont d' pîtaedje oblidyûle). Et pu, ciddé, li rimaedje si fwait etur li dfén d' ene parole da ene sakî, et le coron do no di cisse djin la.

C' est sovint po rire ene miete d' ene trope di djins ki s' kinoxhèt, et ki n' si rtournèt nén d' çoula.

Disti-rima po les scoles di Bive (a môde di paskeye pol fén di l' ashyinne do waeyén-tins 2019)

Vinoz a scole dilé mi, Dit-st ele <i>la</i> Madi	Li walon, c' est on fameus bazår, Dit-st i l' André Jancårt
C' est tos les mårdis, Dit-st i l' Gui	C' est l' tiesse ki fwait del djimlastike, Dit-st ele Monike
On a bén do plaijhi Dit-st i l' Dani	Dj' î frîze el menindjite toltins, Dit-st i Caramin
Dj' î a-st apris m' croejhete, Dit-st ele l' Uguete	Mins c' est plaijhant ådla, Dit-st ele Såra
Et mi l' <i>ortografiye</i> , Dit-st ele Juliye	Adon, rivnoz å bontins, Dit-st i l' Lucyin
Et mi, k' <i>in lièr</i> , c' est on live, Dit-st i l' Ive	Dj' î serans les prumires, Dijhèt ele les Bivires
C' est come ene pitite famille, Dit-st i l' Emile	Nonna, ci i serè nozôtes les prumîs Dijhèt i les Yålis.
Dj' elzî conte mes flåwiretes, Dit-st i l' Alfred	Motoit ki dj' î rårè les soçons, Dit-st i l' Leyon.
Ele sont crâsses, mins on n' si rtoûne nén po ça, Dit-st ele Marina	E ratindant, boune anêye et boune santé Dit-st i l' Runé.
On n' si va nén catchî dzo les <i>tåles</i> , Dit-st ele Mariye-Påle	

Tchanson

Poureye potêye des DJIFFS



- 1) Et si c' est po-z eraler, nos n' eralans nén co
- 2) Les fameus panea-cous, i trovèt todi a rdire / Les fameus panea-cous,
i meritèt d' esse pindous.
- 3) Bonswer Mareye Clape-shabot, trossîz bén vosse cote cwand vos iroz
mode (adoucixhant [*euphémisme*] po po : tchire / Bonswer Mareye
Clape-shabot, trossîz bén vosse cote cwand vos iroz co.

...

Les DJIFFS, c' est ene binde di tchanteus e walon. Leu no vént del shûte des prumirès letes di leus ptits nos.

I fwaiynut les paroles di leus tchansons eshonne. I rprindnut cobén des viyès airs po rmete des novelès paroles. Totes leus tchansons sont-st amuzantes. Li pus cnoxhowe, c' est kécfeye "Li rock des cinsîs", dedja oyou âs scoles di Bive.